

(Modifichis e integrazions al Regolament di Organizazion, fat bon cun deliberazion di Z.P. n.343 dai 9.12.2004 e modificât cun deliberazions di Z.P. n.313 dai 15.12.2005 e n.238 dai 28.9.2006)

Art. 24

Conferiment di incarics fûr

1. Pal conferiment di incarics di colaborazion, di studi o di ricercje o di consulencis a sogjets estranis a la Aministrazion e vâl, daûr di ce che al proviôt l'art. 3, come 56, de Leç 24.12.2007, n. 244 (Finanziarie dal an 2008), la discipline di chest regolament, integrate cu lis previsions de deliberazion di Z.P. n.3 dai 13.1.2000, che e à par ogjet la "Aprovazion dai criteris par dâ incarics professionâi a personâl di fûr".
2. I incarics a sogjets di fûr si ju da par miorâ cun apuarts professionâi i fins istituzionâi dal Ent.
3. Chest regolament nol vâl par dâ chestis tipologjiis di incarics, che a son invezit disciplinadis in mût specialistic di disposizions di leç:
 - incarics pe difese e pe rapresentance in judizi e pal patrocini de Aministrazion, cun ducj chei che a rivuardin ativitâts di nodâr, par vie dal caratar plui che altri fiduciari di sielte e di afidament;
 - incarics relatîfs a prestazions pe esecuzion di lavôrs publics e di voris publichis;
 - incarics pe redazion di struments di planificazion;
 - incarics relatîfs ai components dai organisims di control interni e dal Nucli di valutazion;
 - incarics che a àn a ce fâ cu lis ativitâts di formazion dal personâl dependent.
4. No jentrin ta chest regolament chês prestazions di servizis che a puedin jessi disciplinadis di contrats di apalt cun dutis lis disposizions normativis in vore.

Art. 25

Condizions di amissibilitât

1. Par esigjencis che no si rive a frontâ dome cul personâl in servizi, la Aministrazion e pues dâ incarics individuâi, a mieç di contrats di lavôr autonom, a esperts indotâts di provade specializazion universitarie tun ciert setôr, cuant che:
 - l'ogjet de prestazion al corrispuint aes competencis che l'ordenament i da a la Aministrazion e a obietîfs e progjets specifics e determinâts;

- la Aministrazion si è prin di dut sigurade che pardabon nol è pussibil doprâ dome lis risorsis umanis internis;
- la prestazion e je di nature temporanie e un grum cualificade;
- la Aministrazion e à za decidût durade, puest, ogjet e paie de colaborazion.

Art. 26

Incarics di studi, di ricercje, di consulence e di colaborazion

1. Definizions

-Incarics di studi

I incarics di studi a àn par ogjet lis analisis, lis indagjins par fins di cognossince, i aprofondiments o lis verifichis e la ricuelte di informazions e di dâts. L'art. 5 dal DPR n. 338/1994 al determine il contignût di chestis tipologjiis di incarics, che si sierin simpri cu la consegne di une relazion scrite finâl, che e ilustre i risultâts dal studi e lis soluzions che si proponin.

-Incarics di ricercje

Par dâju bisugne prin che la Aministrazion e vedi za pronte la programazion. Come i incarics di studi, a àn par ogjet lis analisis, lis indagjins a fin di cognossince, i aprofondiments o lis verifichis e la ricuelte di informazions e di dâts.

-Incarics di consulence

A son domandis di parês e di valutazions tecnicis fatis a esperts di fûr par sigurâ a la Aministrazion supuarts specialistics, di regolâ cul contrat di prestazion di opare inteletuâl (ex artt. 2229–2238 dal codiç civîl).

A valin a titul indicatîf chescj esemplis:

- studis e soluzion di cuistions che i integnin a la ativitât de Aministrazion comitente;
- prestazions professionâls che a puartin a vê parês, valutazions, judizis;

- consulencis legâls, fûr che la rapresentance processuâl e il patrocini de Aministrazion.

-Incarics di colaborazion

Cul afidament dai incarics di colaborazion esterne si intiessin rapuarts di lavôr autonom.

La discipline juridiche di chescj rapuarts di lavôr e va cirude tal Titul III dal Libri V dal c.c. relatîf, di une bande, al contrat di opare (artt. 2222-2228 c.c.) o al contrat che al à par ogjet il compiment, daûr paie, di une opare o di un servizi cun lavôr plui che altri in propri e, di chê altre, al contrat di opare inteletuâl (artt. 2229-2238 c.c.) o al contrat davuelt di persone di cui che al esercite ativitâts professionâls, vâl a dî ativitâts che a àn il lôr esercizi condizionât de iscrizion in Listis (es.: avvocats, inzegnîrs, architets, gjornaliscj, miedis, e vie indenant).

Par esempi, a partegnin a cheste categorie ancje i rapuarts di colaborazion coordinade e continuative e i rapuarts di lavôr ocasionâl.

Art. 27

Afidataris

1. I incarics di studi, ricercje, consulence e colaborazion a puedin vignî afidâts a:
 - a) universitâts o lôr structuris organizativis;
 - b) societâts ents e altris istitûts a partecipazion publiche;
 - c) societâts, fondazions e personis juridichis privadis;
 - d) professioniscj, ancje associâts, e sogjets che a àn une provade e specifiche esperienze o competence, ancje tal cjamp di professions no sogjetis a regolamentazion;
 - e) docents universitaris;
 - f) sogjets esternis di particolâr e provade specializazion universitarie.

Art. 28

Afidament dal incaric

1. Pal conferiment di incarics professionâi a valin lis disposizions proviodudis de deliberazion di Z.P. n. 3 dai 13.1.2000, che a àn par ogjet la “Aprovazion dai criteris pal afidament dai incarics professionâi”. Invezit, pal conferiment dai incarics di colaborazion, cun contrats di lavôr autonom, di nature ocasionâl o coordinade e continuative, a valin lis proceduris comparativis che si cjatin tal art. 32 seguitîf.
2. Par ce che i inten al afidament dai incarics di studi, di ricercje e di consulence la Aministrazion e pues domandâ la iscrizion te Liste professionâl e la documentazion che e prove la esperienze fate, ancje in relazion al incaric di dâ in afidament.

3. La determinazion di afidament dal incaric che e indiche i sogjets sielzûts, ce incaric che al ven dât e trop che al ven paiât, e va publicade sul sît web de Provincie. La publicazion e varà po di jessi inzornade cu la indicazion dal impuart pardabon paiât.
4. Se dut chest nol ven publicât, la paie di ce che al è dovût pai incarics di colaborazion o di consulence e devente un at dissiplinâr no lecit e al determine responsabilitât erariâl.

Art. 29

Incompatibilitât e durade

1. I incarics di studi, di ricercje, di consulence e di colaborazion no puedin vignî afidâts:
 - a) a sogjets in conflit di interès cu la Aministrazion;
 - b) a components di comitâts e di organisims colegjâi za costituîts tal Ent, cuâl che al il lôr non, pal davuelziment di ativitâts di studi, di ricercje e di consulence che a jentrin dentri dai lôr compits.
2. I incarics a puedin lâ in afidament par no plui di un an, e la Aministrazion e à di sigurânt la rotazion. Il proviodiment di afidament dal incaric, dut câs, al pues disponi daûr motivazion la atribuzion di un gnûf incaric al stes sogjet o la prevision di une durade plui lungje dal an, se lu imponin lis carateristichis de prestazion.

Art. 30

Paie pai incarics di studi, di ricercje e di consulence

1. La paie pai incarics di studi, di ricercje e di consulence e ven dade daûr de professionalitât che al à il sogjet afidatari, dal impen domandât, de complessitât de prestazion e de sô durade.
2. La Aministrazion e pues paiâ a ratis, a scjadencis prestabilidîs, intant dal davuelziment dal incaric.

Art. 31

Paie par incarics di colaborazion

1. Tai limits di ce che e previôt la leç, se nol è pussibil doprâ personâl dependent pal davuelziment di ativitâts ancje ordenariis, la Aministrazion e pues, daûr motivazion, afidâ incarics di colaborazion a sogjets di fûr, tal rispiet des disposizions in materie di lavôr.
2. La paie de prestazion e ven stabilide in funzion de ativitât ogjet dal incaric, de cuantitât e de cualitât de ativitât, dal ûs, se al ven fat, de bande dal colaboradôr di mieçs e di struments siei, ancje in riferiment ai valôrs di remunerazion di marcjât o, se chescj no son, aes pais che

l'Ent al da par prestaziuns parelis a chês ogjet dal contrat, tignût cont ancje des spesis di providence e di assicurazion a caric dal datôr di lavôr, stant ferme la necessitât che e sedi proporziunade a la ativitât di davuelzi e ai risultâts vûts de Aministrazion.

3. Ce che al è dovût al ven pal solit paiât a la fin dal incaric, se il disciplinâr nol proviôt diviersementi, in relazion aes fasis eventuâls di disvilup dal progjet o de ativitât ogjet dal incaric.

Art. 32

Proceduris comparativis pal conferiment di incarics di colaborazion

1. Chest articul al dissipline lis proceduris comparativis pal conferiment dai incarics individuâi, cun contrats di lavôr autonom, di nature ocasionâl o coordinade e continuative, a esperts di particolâr e provade specializazion universitarie, daûr di ce che al proviôt l'art.7, come 6 bis, dal D.Lgjs. dai 30 di Març dal 2001 n. 165, come che al introdûs l'art.32 dal D.L. dai 4 di Lui dal 2006 n.223, diventât leç ai 4 di Avost dal 2006, n.248.
2. Pai incarics di colaborazion che a compartin une paie plui alte di €. 20.000,00 si adote la procedure descrite tai comis chi sot.
3. La determinazion dal dirigjent dal setôr interessât al conferiment dal incaric e fâs bon un avîs di pueste che al da chestis informazions:
 - la nature de colaborazion (ocasionâl o coordinade e continuative) e l'impen temporâl proviodût;
 - i requisîts professionâi che a vuelin (titui di studi, specializazions, esperiencis di lavôr e vie indenant);
 - i tiermins e i mûts pe presentazion de domande;
 - la durade dal contrat;
 - il compens lort totâl previodût;
 - lis modalitâts di davuelziment de procedure pe assegnazion dal incaric, di decidi a mieç di un colocui e/o de comparazion dai *curricula* professionâi;
4. L'avîs al va picjât te Liste Pretorie e publicât sul sît internet de Provincie. Al va publicizât tes miôr formis, in relazion a la tipologjie dal incaric di dâ.

5. Une comission di pueste e puarte indenant il procediment di comparazion. De comission a fasin part trê components, dipendents dal Ent, e un di lôr al verbalize. La comission le sielç e le clame dongje chel stes dirigjent dal Setôr interessât al conferiment dal incaric.
6. I components de comission no van paiâts.
7. Cun determinazion dirigjenziâl dal stes dirigjent e ven fate buine la liste dai sogjets abii. La liste no met in vore nissune procedure di selezion o paraconcorsoâl, ni no proviôt nissune graduatorie di merit des figuris professionâls, ma dome e individue i sogjets di dâur l'incaric, daûr des esigjencis de Aministrazion. La sielte le fâs il dirigjent su la fonde di une valutazion comparative che e va dâr di chescj parametris: tipologjie dal incaric di dâ fûr, relevance dal *curriculum vitae* e cualificazion professionâl che al à il candidât.
8. Pai incarics di colaborazion che a compuartin un compens pâr o plui bas di 20.000,00 euros, e je ametude la procedure semplificate indicade tai comis seguitîfs.
9. Il dirigjent dal Setôr interessât al conferiment dal incaric al parangone fra lôr lis domandis e i *curricula*, metûts ai ats de Provincie, che a àn carateristichis professionâls coerentis cul incaric di dâ.
10. La individuazion dal candidât abil al conferiment dal incaric le fâs il dirigjent secont la esperience e la cualificazion professionâl che il candidât al à tes materiis ogjet dal incaric.
11. La determinazion di chel stes dirigjent e fâs bon il disciplinâr di incaric, e e dâ at, te jentrade, dai criteris professionâi adotâts par sielzi il sogjet just.

Art. 33

Limits de spese anuâl par incarics e consulencis

1. Il limit massim de spese anuâl pai incarics e pes consulencis al è il 15% de spese pal personâl sostignude de Provincie vie pal an prin.
2. Ogni an la Aministrazion e fâs bon, cul Belanç di Prevision, il Program dai incarics di studis, di ricercje e di consulence, daûr di ce che al proviôt l'art. 3, come 55, de Leç 24.12.2007, n. 244.